

Date – 28/07/2025

Time - 7:30 -7:40Hrs  
AKASHVANI AIZAWL

## REGIONAL NEWS BULLETIN

### HEADLINES (MORNING)

1. Aizawla Mahni Thlai Thar Zuar Pawl' ti a invuah ten chawlhkar khata vawi 2 tal kawng sira thlai zawrh phalsak an phut.
2. Myanmar ralhlante kutzia leh mit-naute lakkhawm hna chu harsatna dang a awm loh chuan tunkar chho hian Lunglei district-ah tan hman tum a ni.
3. Vawiin Lok Sabha rorel inkhawmah Operation Sindoor chungchang sawihona hun bik hman a ni dawn.
4. Prime Minister Narendra Modia chuan Chola lalramin hnam ziarang, in leh hmun ropui tak tak an hnutchhuah chu chhuanawm a tih thu a sawi.

<><><>

### VEG VENDORS

‘Mahni Thlai Thar Zuar Pawl’ ti a invuah Mizo hmeichhia an thlai thar zuar thinte chuan Aizawl a chawlhkar khata vawi 2 tal kawng sira thlai zawrh phalsak an phut.

Mahni Thlai Thar Zuar Pawl hian tun hnai khan thuchhuah siamin an harsatna tawhte an tarlang a. Sorkar leh mipuite chu Aizawl khawpui a lirthei veivak dinhmun hre chung a ei zawn theihna chanvo an neih hriatsak turin an ngen a, hemi atan hian chawlhkar khata ni 2 tal kawngkama an thlai tharte an zawrhchhuah phalsak a hrethiam turin an ngen a ni. An pawl chuan Aizawl khawpui kawngpui ticheptu chu kawngpui sir ke a kalna a lirthei hunte, insakna bungraw dahte leh chawhmeh zawrh chungchanga harsatna awmte an hriatthiam thu an sawi a. Aizawl khawpui vawn thianghlim chu an duh ve tho rualin kawng kama mahni thlai thar zuara eizawng hmeichhiate zawng zawng khapsak vek an nih chuan an eizawna-in a tuar hle dawn niin an sawi.

Mahni thlai thar zuartu pawl chuan thingtlanga an thlai thar tharlam tak tak khawpui a an zawrh zui zel theihna atan sorkarin ruahmanna fel zawk siamsak se an duh thu an sawi a. Chuti lova an eizawna tihtawpsak ngawt chu India Constitution article 21-na bawhchiatna a ni, an ti a. Mizo hmeichhia mahni thlai thar zuarte chu zahawm taka eizawngtu an ni tih sawiin central sorkarin hmeichhe kuthnathawkte chanvo a humhalh anga humhalh ve turin Mizoram sorkar an phut a. Sorkarin ruahmanna fel zawk a siam hma chuan chawlhkar khata vawi 2 tal kawngpui kama an thlai tharte zawrh phalsak an ngiat a. A nih loh chuan dan tlawhchhana hmalak an tum thu an tarlang a ni.

‘Mahni Thlai Thar Zuar Pawl’ adviser Dr. Lalrindiki Ralte thusawi lo ngaithla ang.

<><><>

MYC

Mizoram Youth Commission (MYC) Chairman Pu Malsawmzuala Ralte chuan Army-a tan dil Mizo tlangvalten kohna an hmuh belh zel an beisei tih a sawi.

Akashvani zawhna chhangin MYC Chairman chuan MYC kaltilanga British Army-a tang duh, Mizo tlangval 247 dilna thehltut atangin mi panga koh zingah mi pathumin British Army an zawm fel tawh tih a sawi a ni.

Pu Malsawmzuala Ralte chuan British Army training hun chhung pawh sawi langin kar 8 vel a nih tlangpui thu leh training lai atangin India pawisa cheng nuai 2 lai thla tin an hlawh thin thu a sawi a. Sipai an zawm hnu reilote-ah thla tin India pawisa cheng nuai 3 an hlawh vat thu sawiin Mizo thalai hrisel tha, zai pui la tawh lemlo tan thil huphurh awm a nih lem loh thu leh British Army-a kum bithliah chu kum 18 atanga kum 37 inkar a nih thute, thiamna lamah pawl 12 pass an pawm thu leh Mizo thalai dil duhte tan ram danga zin theihna passport neih a ngaih thu te a sawi bawk.

MYC Chairman chuan Mizo thalaite tana hma an lakna huang zau zawka kalpui a nih theih na'n Corporate Social Responsibility (CSR) haichhuah kawngah pawh theihtawp an chhuah thu leh kum khat leh a chanve chhungin CSR atang hian nuai 63 vel an hai luh tawh thu a sawi a. MYC-in a hotel management zirna a kalpui chu Honda company te'n a tul ang zawng zawng, zirtirtu hlawh thlenga an tumsak thu sawiin nikuma zirlai batch nga an neih leh kumina zirlai batch thum an neih zirna senso belkhawm cheng nuai 14 vel chu Honda company-ten an tumsak vek thu a sawi bawk.

<><><>

#### BIOMETRIC ENROLMENT

Myanmar raltlante kutzia leh mit-naute lakkhawm hna chu harsatna dang a awm loh chuan tunkar chho hian Lunglei district-ah tan hman tum a ni.

Lunglei district chuan Myanmar raltlante biometric enrolment hna hi engtik lai pawhin an tan thei reng tawh tih district thuneitute'n Akashvani Aizawl an hrilh a, July thla chhung ngei a tan nghal thei turin an inpuahchah fel vek tawh a ni, an ti. District dang thenkhat official-te pawhin ruahmanna an peihfel tawh thu an sawi ve bawk.

Home secretary Pu Vanlalmawia chuan tun July thla chawhnu lam atanga tan tum, Mizorama Myanmar raltlan awmte biometric enrolment kalpui tanna tur atana sum ruahman chu cheng nuai 38 a nih thu a sawi a. Ngawrh taka inpuahchah chhovin July thla chhung ngei a tan hman tura ruahmanna siam a nih thu a sawi a. Cheng nuai 38 hi a bul tanna atana senso ngai zat tur a nih phawt thu a sawi bawk. Senso zawng zawng hi MHA tum vek tur a ni chungin hna tan hi a hmanhmawh thlak tawh si avangin Mizoram sorkar sum lo hman phawt a ni dawn ni a thudawn a ni a. Neih sa bakah computer, web camera leh hmanraw pawimawh dangte lei belh a ngai dawn a, lei belh mek zel a ni bawk. Enrolment portal hi National Informatics Centre (NIC)-in an duan a ni a, Myanmar raltlante chhinchhiahna atan hian

Foreigners Identification Portal & Biometric Enrolment (FIP&BE) chu hman a ni dawn a ni.

Tun dinhmunah hian Mizoramah Myanmar raltlan hi mi 32,504 an awm mek ni a chhinchhiah a ni a. Champhai district-ah tam berin, Lawngtlai district leh Siaha district te'n an dawl a ni.



#### BORDER TALKS

Ramri buai chungchanga inremna siam tura Mizoram leh Assam official-te inbiak lehna hun tur ruahman kawngah Assam official-te thu ngaihchan mek a ni.

Inrinni, July ni 26 kha kum 2021 a Vairengte dai-a Mizoram leh Assam Police te ramri buai kaihnawih a inkah champha vawi 4-na a ni a. Kha tah khan Assam Police 6 in vanduaithlak takin nunna an chan a ni. He tih lai hian state pahnih secretary kaihhruai palaite inbiak lehna hun tur hi Assam lam hian an la rawn tichiang rih lova, a hmun tur erawh chu Mizoram ni turin ruahmanna siamsa a ni a, secretary kaihhruai state pahnih palaite hi an inbe leh a nih chuan awmze nei taka an inbiak vawi hnihna tur a ni dawn a ni. Kumin April ni 25 a Guwahati-a an inbiakna hmasa zawkah khan inbiak vawi hnihna chu Mizoram thleng se, hun remchang hmasa berah inbiak leh ni se tiin thu an dah a.

Mizoram lamin Mizoram leh Assam ramri atana a pawm, kum 1875 hriattirna chhuah kaihnawih Assam hnena February ni 13, 2023 leh November ni 28, 2023 a thawnte chu uluk tak leh chipchiar takin Guwahati inbiakna-ah khan sawiho a ni a. Bengal Eastern Frontier Regulations, 1873 tlawhchhan a kum 1875-a hriattirna chhuahin a huam chin ram chungchang leh, khaw hrang hrang awmdan Mizoram-in Assam hnena a a thehluk tawhte sawiho a ni bawh a. Assam lam hian November ni 28, 2023 a Mizoram lehkha thehluk a chhanna hi mumal takin a hmalam thehluh se la, chumi hnu-ah official level inbiakna-ah sawiho leh ni se ti a remtih tlan a ni. Chutih lai chuan Mizoram lamin kum 2023 November ni 28-a ram hauh chin khaw 62 chungchang hi a la rawn chhang let rih lo bawh niin home department hotute chuan Akashvani Aizawl an hrilh a ni.

Mizoram leh Assam inkar ramri hi North-Eastern Areas Reorganisation Act, 1971-ah khan ziahlan a ni chungin state pahnih ramri km 123 a thui hi a tak tak a hmuna rin a awm lova, chu chu ramri buai lo intanna bul ber chu a ni a.



#### COVID SITUATION

Tun dinhmunah Mizoramah Covid-19 hri kai mi 1 enkawl lai mek a awm a, kuminah hri kai hmuhchhuah 13 an awm tawh.

Integrated Disease Surveillance Programme (IDSP) hotute hnen atanga thu dawn danin Nilaini khan Covid hri kai inringhlel mi 25 endik zingah pakhat chuan Covid hri a kai tih hmuhchhuah a ni a. Hri kai hmuhchhuah hi Aizawl district ami niin Zoram Medical College & Hospital a hmuhchhuah a ni

a. Hri kai tih a langchhuak lova, ngaihtuahawm a nih loh thu doctor-te'n an sawi. Kumin hian May thla laihawlah khan Covid hri kai hi hmuhchhuah leh hmasak ber a ni a, tun thleng hian hri kai mi 13 hmuhchhuah tawh a ni a, buaipuiawm khawpa na an awm lo.

Kum 2020 bul lama Mizorama Covid lo luh ve rinhlelhna a awm atanga tun thleng hian sample nuai 19, sing 9, sang 7 leh 829 endik a ni tawh a. An zinga nuai 2, sing 3, sang 9 leh 648 te chuan Covid an kai tih hmuhchhuah a ni. Covid hri kai zingah a vaiin mi 734 an thi a. Kum 2021 khan thi tam berin mi 538 thi chhinchhiah a ni a, kum 2022 khan mi 180 thi a chhinchhiah a ni a, kum 2020 leh 2023 khan mi 8 ve ve an thi bawk a ni.

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

#### OPERATION SINDOOR

Vawiin Lok Sabha rorel inkhawmah Operation Sindoor chungchang sawihona hun bik hman a ni dawn. Union Parliamentary Affairs Minister Kiren Rijiju chuan Pahalgam firfiaka beihna leh India in Operation Sindoor hmanga a chhanletna hi tun Parliament fur thutkhawmah hian sawiho a ni ang tih a lo sawi tawh a ni.

Pu Rijiju sawidanin Lok Sabha Speaker Om Birla hova Business Advisory Committee thukhawm chuan Operation Sindoor chungchang sawihona hun bik siam hi a rel a. Lok Sabha-ah darkar 16 chhung hun pek a ni dawn tih sawiin naktuk Thawhlehi hian Rajya Sabha ah darkar 16 chhung tho sawiho a ni ang a ti a. Pu Rijiju chuan opposition ten Operation Sindoor chungchang sawiho an phut angin sawrkar chuan hun remchang a siam a ni a ti bawk.

<><><>

#### SUPREME COURT

Vawiin hian Supreme Court chuan Election Commission in Bihar Special Intensive Revision (SIR) a kalpui khinna thubuai a ngaihtuah dawn. Justice Surya Kant leh Joymalya Bagchi te thutna bench chuan he thubuai hi a rel dawn a. A khingtute hian kum 2025 Bihar Assembly inthlanah voter tam tak paih an nih phah dawn niin an khing a ni. Hetihlai hian Election Commission chuan voter list diktak neih an tum thu an sawi thung a ni.

<><><>

#### PM IN TAMIL NAUD

**Prime Minister Narendra Modia chuan Chola lalramin hnam ziarang, in leh hmun ropui tak tak an hnutchhuah chu chhuanawm a tih thu a sawi. Nimina Tamil Nadu-a Gangaikonda Cholapuram-a Aadi Thiruvathiral kut a hmanpuinaah he thu hi sawiin Pu Modia chuan Rajaja Chola leh Rajendra Chola te chu ram inpumkhatna lantirtute an ni a ti a. Chola lal ropui pahnihte sulhnu chu hriatreng tur thil anih thu a sawi bawk a ni.**

**Pu Modia chuan Chola lalram hnuaia eibar zawinna leh hmasawinna lama an sulhnu chuan vawiin thlengin mi rilru a kaihruai tih a sawi a. Chola lalte enkawlina hnuaiah kawng tinrengah hmasawinna a thleng tih a sawi a ni.**

**Prime Minister Modia hian nimin vek khan Thoothukdui Airport terminal thar leh hmasawinna project cheng vaibelchhe 4800 chuang hu a hanwg bawk a ni.**

<><><>